

Inatsisartut aaliangigassatut siunnersuut Naalakkersuisut peqquneqassasut takornariaqarnermi suliffeqarfii ingerlatani nalunaarusiakkut qulaajassallugit, qanoq iliornikkut nunaqavissut inatsisitigut allaffissornikkut aaqqissuussaanertigullu il.il sunniuteqarnerpaamik aalajangiisinnaalernissaat, nalunaarusiaq kingusinnerpaamik inatsisartunut agguanneqassaaq UPA 2023-imi.

Siumup Inatsisartunut ilaasortaatitaannit saqqummiunneqartoq

pillugu

Inuussutissarsiornermut Aatsitassanullu Ataatsimiititaliap siunnersuutip aappassaaneerneqarneranut

ISUMALIUTISSISSIONTAA

Ataatsimiititaliap suliarinninnermini inuttarai:

Inatsisartunut ilaasortaq Mariane Paviaisen, Inuit Ataqatigiit, siulittaasoq

Inatsisartunut ilaasortaq Aqqalu Jerimiassen, Atassut, siulittaasup tullia

Inatsisartunut ilaasortaq Hans Aronen, Inuit Ataqatigiit

Inatsisartunut ilaasortaq Lars Poulsen, Siumut

Inatsisartunut ilaasortaq Aslak Jensen, Siumut

Inatsisartunut ilaasortaq Agathe Fontain, Inuit Ataqatigiit

Inatsisartunut ilaasortaq Pele Broberg, Naleraq

UPA2022-mi maajip sisamaanni siullermeerinninnerup kingorna siunnersuut ataatsimiititaliamit misissorneqarpoq.

Siunnersuutip imarisaa siunertaalu

Nunaqavissut takornariaqarnermik ingerlatsinermi annertunerpaamik aalajangiisinnaalernissaat siunertalarugu inatsisit il. il. qanoq aaqqissuunneqarsinnaanerisa qulaajarneqarnissaanik Naalakkersuisut peqquneqarnissaat siunnersuummi siunnersuuteqartumit kissaatigineqarpoq.

Inatsisartuni siunnersuummik siullermeerinninneq

Takornariaqarnermi ingerlatsinerup najukkamit aallaaveqarlunilu sunniuteqarfingineqarnissaata nukittorsarneqarnissaanik siunnersuuteqartup kissaataa siullermeerinninnermi

taperserneqarpoq. Naalakkersuisuttaaq siunnersuut tapersorsorpaat. Atassutip siunnersuut tapersinngilaa, tassa takornariaqarnermi ingerlatsinermi najukkameersut ingerlatsinissaminut tamakkisumik periarfissaqareersutut isigineqarmata, aammalu assersuutigalugu nunaqvissunissamik piumasaqaateqarnissaq kingunerluuteqarsinnaasutut isigineqarmat.

Ataatsimiititaliap siunnersuummik suliariinninnera

Takornariaqarnermut tunngasuni inatsisit aaqqissuuteqqinnejarnissaat aallartinneqassasoq, tassungalu ilanngullugu takornariaqarnermi Kalaallit Nunaannut inatsisivimmik Naalakkersuisut malillugit takornariaqarnerup suliassaqarfiani pitsaanerpaamik atugassaqartitsisussamik suliaqarnissaq, Naalakkersuisut akissuteqaamminni paasissutissiissutigigaat ataatsimiititaliamit oqaatigineqassaaq. Taamaattumillu inatsisit allaffissornikkullu aaqqissuussinerit atuuttut paasinarsisinneqarnissaat pissusissamisoortumik alloriarnerusoq Naalakkersuisut ilanngullugu paasissutissiissutigaat, tamannalu siunnersuuteqartup kissaataanut naapertuuppoq. Taamatuttaaq takornariaqarnermik ingerlatsinermi najukkaniittut sapinngisamik annertunerpaamik sunniuteqarnissaannik siunnersuuteqartup kissaataa Naalakkersuisunit isumaqatigineqarpoq.

Suliassaqarfiiit allat assigalugit inuussutissarsiuteqarfimmi pineqartumi piffissami qanittuinnaanngitsumi aammali ungasinnerusumut atugassanik inuiqaqtigiit sapinngisamik annertunerpaamik pissarsinissaannik qulakkeerinnittumik pilersitsinissaq qitiutinneqartariaqarmat ataatsimiititaliamit oqaatigineqassaaq. Ungasittumullu isiginninnermi najukkamiittut sapinngisamik annertunerpaamik aallaavigineqarlutillu akuutinneqarnissaasa qulakkeerneqartariaqarnera pisariaqarpoq. Najukkami takornarialerisutut ingerlatsisunut suut periarfissaareernersut kiisalu taaku nukittorsarnissaannut qanoq iliuuseqartoqaqqissinnaanersoq Naalakkersuisut nassuaasiornerminnut aammalu inatsimmik suliaqarnerminnut atatillugu qulaajassagaat ataatsimiititaliamit kaammattutigineqarpoq. Tamatuma saniatigut takornariaqarnermik ingerlatsisut nunanit allaneersut suliaat qanoq annertunerpaamik nunatta aningaasaqarneranut iluaqutaasinnaanerat ilanngunneqartariaqarpoq. Qanoq iliornikkut siviktsuinnarmik nunatsinniillutik ingerlatsisartut nunatta aningaasaqarneranut akileraarutinut akiliinikkut allatigulluunniit iluaqutaativissinnaanerat qulakkeersinnaavarput?

Naalakkersuisut nassuaammik inatsimmillu aaqqissusseqqillutik suliaqarnerisa malinnaaviginissaa ataatsimiititaliamit qilanaarineqarpoq. Tassunga atatillugu akuersissummik allagartaliisinnaaneq isumaliutigineqarsinnaavoq, tamatumani Islandimi ilisimaneqartutut sullississutinik aalajangersimasunik neqerooruteqarnissamut angalatitsiviit ingerlatsisullu allat akuersissutaateqartussaallutik, tamannalu aalisarnermut inatsimmi inuussutissarsiutigalugu aalisarnermut tunngasuni aalajangersakkani (§ 6) naluneqanngitsutut nunatsinni angerlarsimaffeqarnissamik ilaqaqtinneqarsinnaavoq, tassani inuiqaqtigiinnut kalaallinut aalajangersimasumik attuumassuteqarnissaq, Kalaallit Nunaanni najugalittut

allattorsimaffimmiainnissaq, tamakkiisumik akileraartussaatitaanissaq il. il. piumasaqaataavoq. Siunnersuummik matuminnga aammalu takornariaqarnermut inatsisinik aaqqissusseqqinnissamik Naalakkersuisut suliaqarnerminni “najugaqavissuunerup” qanoq paasineqarnissaanik ilangussinissaat ataatsimiititaliamit naatsorsuutigineqarpoq. Takornariaqarnermik ingerlatsinerup najukkami inuiaqtigiinnit aallaaveqarnissaanik siuarsaataallunilu pitsasumik sunniuteqarnissaanut atugassaqartitsinissap pilersinneqarnissaa, tamatumalu peqatigisaanik aningaasaliisartut avataaneersut mattunneqannginnissaat aammalu ulapinnerup nalaani ajornartorsiutaasinnaasut eqaatsumik isumagineqarsinnaanissaat unammillernartuussapput.

Siunnersuutip aningaasaqarnikkut kingunissai

Nalunaarusiapi kissaatigineqartup suliarinerani allaffissornikkut aningaasaqarnikkullu kingunerisassat AC-p ukiup affaanik sulineranik naleqartutut siunnersuuteqartumit nalunaarutigineqarput. Ataatsimiititaliaq tamatumunnga oqaaseqaatissaqanngilaq.

Ataatsimiititaliap inassuteqaatai

Ataatsimiititaliami amerlanerussuteqartut, Inuit Ataqatigiinneersut Siumumeersullu siunnersuut akuerineqassasoq inassutigaat.

Ataatsimiititaliami ikinnerussuteqartoq Atassummeersoq siunnersuut pillugu ima oqaaseqaateqarumavoq:

“Atassummiit takornariaqarnermut inatsisiornikkut, siunnersuutip avataaniit aningaasaleerusussinnaasut soqutiginnissinnaanerat innarlerneqarsinnaanera ernumanartissinnaangatsigu, siunnersuut taamatut isikkoqartillugu itingartipparput.

Takornariaqarnikkut innuttaasut qaammarsarneqarnerunissaat aqutissatut isigaarput, inatsisiornikkuunngitsoq.”

Tamanna tunngavigalugu siunnersuut itigartinneqassasoq **ikinnerussuteqartup** inassutiga.

Ataatsimiititaliami ikinnerussuteqartoq Nalerameersoq siunnersuut pillugu ima oqaaseqaateqarumavoq:

“Siunissami naatsorsuutigineqarsinnaasumik siunnerfeqarnissaq Naleqqamiit pingartissimaqaarput.

Naleqqap tunngavilersutai paasilluaqqullugit, takornarialerinermut ilinniartitsisimagaluarneq qiviartariaqarparput. Kalaallit pineqartillugit, ilinniaqqaarluta atorfinissinnaanissaq oqariartuutaalluni.

Akerlianik oqaatsinik piginnaanillit nunatta avataaniit tikisinneqartarlutik, takornarialerisunik angallassisussat. Ogaluttuarisaanerput kulturerpullu annerusumik qaammaasaqarfinginagu.

Ataasiaannarata tusartarparput allamiut nunatsinnut tikkaangata apeqqutigisaraat, naak kalaallit?

Maanna ataatsimiitaliami isumaliutissiissut suliarinerani malunnarpoq inersuarmi Nunaqavissut eqqartorneqarsimagaluartut. Sulili partiit anginersaat nunaqavissut nalunaarsornissaat pillugu politikkikkut suut takorloorsimanerlugin isummernani. Inatsisartuni oqallinnermi isummersinnaannginneq tunngavilersutigalugu ataatsimiitaliami pissussaanerarlugu.

Ullumikkut nunatta avataaniit sulisartortartut aningaasaliisartullu tikilluaqqusaanerat siunissami qulakkeerniarlugu, ersarissumik sinaakkusiinissaq Naleqqamiit takorloorsimagaluarparput.

Assersuutitut atorsimallutigu ILO-169 nunatsinni atuutereertoq aallavigissallugu.

Ullumikkut nunasiaateqarsimasut nunatsinni nunasisunngorlutik suliffeqarfinnik pilersitsisarnerat takussaavoq. Nunaqavissut peqataanerat inatsisitigut qulakkeerneqarnikuunngimmat. Allaammi Naleqqamiit maluginiarparput oqallinnermi nunatsinni nunasisut skatteertarpata nunaqavissutut taanissaanik partiit anginersat tulliat oqariartuutigiaat. Aammalu ILO-169 nunatsinni atorniarnagu. Tamanna Naleqqamiit ataqqillugu, ikinnerussuteqarluta oqariartuuteqarnissatsinnut tunngaviuvoq.

Tigussaanerusumik tunngavilersortariaqarneq aallaavigalugu Naleqqamiit Canadami suleriuseq, Inuit pingaartillugit innersuupparput. Canadami nunaqavissut allattorsimaffiannik peqarput, uanilu assersuutitut suliffeqarfik "Nasittuq" atussallugu.

"Nasittuq" suliffeqarfiuvoq "Nunavut Inuit Firm Registry"-mi nalunaarsugaasoq, amerlanerussuteqarlutik Inuit aquataat¹.

Taamaassillutik nunaqavissut nunasisullu suleqatigiillutik ersarissumik nalunaarsuivimmik peqarput, naligiimmik ineriartornermut peqataasinnaatillugit.

Naleqqamiit ILO-169 ataqqillugu ICC charte-iani allaqqasoq aallaavigineqarsinnaanera innersuullugu² artikel 1, immikkoortoq 6, nunatsinni Inuit tassaasut.

Takornarialerinermi, nunatsinnilumi suliffiuteqarniaraanni, "kalaaliuneranik" oqariartuuteqarniaraanni, kalaallinik minnerpaamik 51%-imik pigineqarnissaa innersuupparput.

Aningaasaliineq tikilluaqqullugu avataaniit, aammattaaq sulisussarsiorsinnaaneq, taamaasinikkut piginnittuvit nalunaarsortussaanerat ilutigalugu aqutissatualluni nunaqavissut illersorniaraanni.

Ullumikkummi takoreerparput qanoq Amerika-miut suliffeqarfutaat Vectrus Danmarkimi immikkoortortaqarfiliorluni Exelis Pituffimmi isumaqatigiissummi ingerlatsisunngornera ajorineqarneralu.

¹ <https://www.nasittuq.com/about-us/>

² <https://www.inuitcircumpolar.com/icc-international/icc-charter/>

Kalaallit Nunaani maanna amerikkamiut suliffeqarfiataat Vectrus aamma danskit suliffeqarfiataat Permagreen Grønland A/S suleqatigiillutik nunatsinni suliffeqarfiliorput, Inuksuk A/S Pituffimmi neqeroortitsinermut atugassaq.

Nunaqavissut illersugaanatik taamatut avaqqutaarinninneq siunissamut tulluarsorinagu Naleqqamiit ersarissumik oqariartuitigissavarput. Nunani allaneersut nunatsinni allakanik nakkaatitsivilerlutik nunaqavissuulersaramik? Nunatsinni akileraartussaanerup avaqqutaarneqarsinnaanera, piginnittuviit nunani allaneernerat ilutigalugu nunatsinni kisiat ajornartorsiutaanngilaq.

Nunaqavissuuneq kinaassutsimut attuumassuteqarnera avaqqunneqarsinnaanngilaq, aammattaaq nunatsinniit aningasat annissuinnarneqartarnerannut takussutissaqareernera malunnarluni.

Nunaqavissut piginnittuisuuppata, nalilinnik annissuineq (transferpricing) pinngitsoornerusinnaagaluarparput? Nunatsinni nunasisut suliffeqarfiataat nunaqavissullu suliffeqarfiataat ersarissumik nalunaarsornissaannut, nunani allanisut iliuutsit ilikkagaqarfigalugit innersuunnaqaaq.

Ullumikkut inuaat kalaallit kinaassuseqaratik inisisimanerat ilutigalugu, maannakkut suleriuseq ingerlateqqinnera Naleqqamiit isornartutut oqaatigisariaqarparput.

Takornarialerinerimi nunatsinni inuit, Kalaallit, immikkullarinnerat takornarianit alakkarterneqarumasarpoq. Nunaqavissullu kalaaliusut inatsisitigut illersornagit ingerlariaqqinniarneq assigiinnarpaa nunarput aningasaatilinnut allamiunut maannamut tunniussuisimaneq ingerlatiinnassallugu.

Naleqqamiit pingaartipparput inunnik immikkoortitsinata ingerlanissaq, unali inuaat piginnaatitsissutaaniinnerat ersarissumik naqissuserneqareernikoq erseqqissartariaqarlugu. Imaluunniit Kalaaliussuseq, nunaqavissuussuseq postboks-eqarnermiippa?

Naleqqamiit ersarissumik oqariartuitigissavarput inatsisiornitsinni nunaqqativut, ilaquettavut, nunaqqativullu nunani allaniittut eqqaamaqqunissaa kikkut nunaqavissuunerannut nalunaarsuinissamut. Inuit Nunaat, Kalaallit Nunaat.

"Nunatsinni akileraartartut nunaat" nunani allani atorneqanngilaq, kikkut nunaqavissuunerannut nalunaarsuinermut."

Tamanna tunngavigalugu **ikinnerussuteqartut** siunnersuutip **akuersissutigineqarnissaa** inassutigaat.

Ataatsumiititaliap taama oqaaseqaateqarluni isumaliutissiisummilu allassimasutut paasinnilluni siunnersuut aappassaaniigassanngortippaa.

Mariane Paviaisen

Mariane Paviaisen
Siulittaasoq



Aqqalu Jerimiassen
Siulittaasup tullia



Hans Aronen



Lars Poulsen



Aslak Jensen



Agathe Fontain



Pele Broberg